

SNF-Sámi NissonForum

P.b. 110, N-9735 Kárášjohka Org.nr. 979 166 087

PREASSADIEDÁHUS

Gulahallanolmmoš: Stivrallahttu Gudrun Eriksen Lindi, tel +(47) 78 46 73
32, 959 35 626

Kárášjohka, ođđajagemánu 28.b. 2008

SNF-Sámi NissonForuma stivracealkámuš:

Sohkabealledásseárvu ii ollašuva Sámi iešmearridankonferánssas

SNF-Sámi NissonForum moaitá eamiálbmogiid resursaguovddáža Gáldu konferánssa Álttás boahhte vahkus. SNF jearrá manne nissonolbmuid eai ane dađi eanet árvvus logaldallin? Sii leat moattis, ja sin leat bidjan prográmma áibbas lohppii. Buohkat dihtet maid dat máksá. Diehtit velá ahte oassálastit dábálaččat vuolgališgohtet ovdal golmmabeaivásaš konferánssa loahpa.

SNF mielas dásseárvoperspektiiva berrešii leat fáddán juo álgosáhkavuoruin, danne go dássáži dat lea bázahallon bealli. Fáddá dalle čuovošii digaštallama buot golbma beavvi. Konferánssa poster/plakáhta muđui čájeha doaluid dovdomearkka: Vuovdnás almmáiolmmoš guhte okto dáhttu stivrejumi.

Iešmearrideapmi lea sámiide, dego máilmmi earáge eamiálbmogiidda, hui áigeaguovdilis gažaldat. Mannan čakčamánuš Ovttahttojuvvon Našuvnnaid (ON) váldočoahkkin dohkkehii viimmat Riikkaidgaskasaš eamiálbmogiid rivttiid julggaštuša, mas eamiálbmogiid vuoigatvuohta iešmearrideapmái lei guovddáš vuolggasadji. Buot davvirikkat jienastedje julggaštuša dohkeheami bealis, ja dál leage áigeaguovdil guorahallagoahtit mo ollašuhhtit sámiid iešmearrideami ja čoavdit dasa gullevaš hástalusaid.

Eamiálbmogiid resursaguovddáš Gáldu Guovdageainnus lea váldán dan hástalus duodas ja lea lágideamen riikkaidgaskasaš konferánssa Sámi iešmearrideami birra boahhte vahkus, 04-06.02.2008 Álttás. Konferánsii leat bovdjuvvon sihke riikkaidgaskasaš ja sámi áššedovdit doallat sáhkavuoruid eamiálbmogiid ja sámiid iešmearrideami iešguđet beliin.

Prográmma lea viiddis ja máŋggabealat, muhto SNF-Sámi NissonForum lea sakka beahttašuvvan prográmma sohkabealleortnegis. Vuosttas logi logaldalli leat buohkat almmáiolbmot, dasto njeallje nissonolbmo maŋŋálága konferánssa loahpas. SNF jearrá: Makkár árvoortnegis dás lea sáhka? Manne nie máŋga almmáiolbmo ja dušše moadde nissonolbmo? Lea go eamiálbmogiid iešmearrideapmi vuos ja ovddimus almmáiolbmuid fierpmádat ja fáddá?

Iešmearrideami vuoddu

SNF oaivvilda ahte konferánssa prográmma speadjalastá duohtavuoda, man earáge eamiálbmotnissonat leat buktán ovdan: **Ahte dál ságastallan eamiálbmogiid iešmearrideamis ii váldde doarvái bures vuhtii eamiálbmotnissoniid oainnuid ja**

dárbbuid. Ii ge ságastallan váldde vuhtii eamiálbmotnissoniid cuiggodemiid das makkár vuodu ala galgá eamiálbmogiid iešstivrema hukset. Dálá eamiálbmogiid iešstivrenmállet ádestallet váldoservodagaid ja oarjemáilmmi vuogádagaid, mat vuodduduvvet válddi, autoritehta ja ráđđema doahpagiid ala.

Gáldu ordnii ieš mannan čavčča Norgga dásseárvoáittardeaddjiin ja sámi servviid ovddasteaddjiiguin čoahkkima joatkit dásseárvobarggu Sámis. Manne dat dásseárvobargu ii oidno dán konferánssa lágideamis?

Eamiálbmogiid iešmearrideamis lea sáhka eamiálbmogiid ceavzimis álbmogin maiddái boahteáigges. Dan ii goit leat vejolaš ollašuhttit jos guođdit oasi álbmogis guorahallamiid ja ságastallamiid olggobeallái.

Eai dušše nissonolbmot olggobealde

Ja dat ii guoskka dušše nissonbeallái. SNF lea mearkkašan ahte konferánsii lea alla oassálastinmáksu, ja SNF mielas dat dahká konferánssa elihta várás. Sámenuorat ja sámi searvvit/organisašuvnnat mat leat sámi akademálaš ja politihkalaš elihtabirrasiid olggobealde – ja seammás vissásit ohcalit liibba nanosmahttit máhttuseaset ja váikkuhanválddiset iešmearrideami ollašuhttima oktavuodas - eai suite oassálastit. Nu SNF jearráge gean várás konferánssa lea oaivvilduvvon?

Jos aivve servodaga bajimus dássi (álbmoga elihta) beassá dákkár konferánssaide, dat ii nanne demokratiija. Ii das galle, Gáldu gártá dás bargat njuolggadusaidis vuostá, main lea ulbmilin “lasihit dieđuid ja áddejumi álgoálbmotvuoigatvuođaid ja sámi vuoigatvuođaid hárrái”. Ulbmiljoavkkuide gullet “buohkat, geat ohcet dieđuid”, nugo “skuvllat, eaktodáhtolaš organisašuvnnat, almmolaš ásašusat ja eiseválddit”. SNF mielas ii leat Gáldu dán háve láchčán konferánssa dábálaš diehtoáŋgiris sápmelažžii.

SNF vuordá danne ahte Gáldu dán jagi mielde juo lágida rudahis sámi servviide ja organisašuvnnaide ge vejolašvuoda gazzat oahpu ja deaivvadit áššedovdiiguin sámi iešmearrideames ja eamiálbmotvuoigatvuođain.